

鹿
裘
石
室
集

鹿裘不

卷第二十二

宣城梅鼎祚禹金著

文

誄

。王府君誄

萬曆庚辰夏四月山西按察司副使故寧國府
君王公嘉賓無祿于滕府君世琅琊之名胄秉
海岱之靈瑣郎官應宿出入戴星已而明詔
徵其三異法冠正乎百僚偶出一麾迺分吾郡

惠工通賈務農禮士使四民各安其所千里誦
義亾窮古所謂良二千石而無歎息愁恨之心
者則公其選矣奉諱東歸借寇靡逮載牧魏博
之間配惠敬亭之上賜以斧鉞畀之憲刑方驅
駟于里門遽就木于隣境越歲之冬訃音遙屬
黎庶纏悲薦紳銜卹文翁崇祠于西蜀將有事
焉仲卿徙葬于桐鄉嗟何及矣宣城人某某等
爲位而哭刲牲醜酒臨風再拜而誄之博士弟
子梅鼎祚誄曰於嗟府君弈弈有聞筮

羽

自重雲利刃新發綬邪若若琴音在

堂花陰在郭

天子曰嘻令美且都南牀克寄

臣忠而愚

朝注讜言野傾令問醜正卽讐蘭

摧玉璽耳目輟司股肱分郡五馬駢馳亦莫不

慶其慶伊何惠此吉人嚴彼莫夜假我陽春扶

膚就立推分任真中澤集鴈涸轍濡鱗諫討

棠聽虛程石狗足生駑虎冠屏跡迺課農桑務

分已責迺訓子衿張帷正席維溪者東溱潏際

濟川用女內溝耻躬斥金懸橐鞭石如墉上

亾費帑下亾罷工惟妖者董訛言籍勇寔繁有
徒三百曲踊單符折首脅從毋恐兵不列行阱
不易隴胡天不弔陟岵孔艱曷將素旒遄斂朱
幡扳轅靡後說輶不前搏膺泣血左輪則殺
詔塵輦轂起家魏守宣曰賈父魏曰杜母式謳
以謠瓠脯玄酒執法晉陽以相左右追鋒曲蓋
及于故壘兩楹見兆二豎無良長桑卻步湊柏
斯藏豈歲龍蛇賢人是殃嗚呼哀哉泰山中頽
滄海幾竭魚燈膏永燕葵庭沒弟恭友于孫謀

貽厥不朽其名徒朽其骨乍聆爭愕旣信倏疑
百身曷贖萬口同辭漬絮以酒實豆以籩尸祝
有社墮淚有碑嗚呼哀哉

太倉王太公誄

嗟嗟震澤底定東漸于海舒此翔陽鬱爲英采
迺鍾太原吉人藹藹公世滋長其德彌載束修
晉道昭明有融不飾而績不斷而工藝成弗試
材大莫庸依隱玩世卽于公宮位列句臚典司
屬國入奉丹宸出臨紫陌秩設三千俸輕六百

脫屣冠纓推襟泉石厥施未普濬發其祥詒穀
于女爲箕則良嘉儀棣棣令問彭彭平輿之淵
二龍以驥龍驤伊何煌煌太史昔舉哀然錫爾
燕喜白虎讎經黃龍制禮清霄羽毛中朝鼎呂
嚶鳴竟爽實維次君允焉接武亦復多文王斐
極選九品銓羣式瞻豐鎬靡不作人 天子曰
嘻惟忠移孝子仕之能原父之教有恭王言以
代臣報渙汗用麻賁園斯耀貴不渝素終脊於
初儻車致戒過里必趨其居熙熙其行于于甘

雨沃若條風穆如丁戊之間國是厖亂醜正卽
仇伯也中斷偕仲歸乎先幾集霰威鳳高騫白
駒永歎公猷筦爾汝今在田大義克展人紀彌
宣婉容益篤聚順無讐振振孫子承志孔虔杜
惠罕窺端居多暇公厭世紛怛然而化蕙帳辭
春璿臺俄夜饋醕何從元龜長謝天聰忽啓周
道聿新僉謀伯矣而求舊人金甌在幄玄纁在
門元氣斟酌萬象陶鈞仲且迴翔攬輝代晝政
化維鈞以相左右圭璧兼陳墳麓迭奏祭海先

河咸公是壽其昔繆舉翳伯爲規伏軾良復執
憲來茲將修尸祝匪其杓之典刑庶在豈以吾
私嗚呼華祝者三箕疇惟五得全全昌孰其公
伍千里尊羹敬佐清醑祖公帝鄉逍遙胥宇

王母太恭人誄

惟萬曆二十九年庚子秋九月明故中憲大夫
永嘉王公之妃前寧國府君季宣長公之母累
封太恭人林氏以踰耄卽世嗚呼哀哉國隕女
宗家爽姆儀旣壽且臧同榮共悲徽音孰嗣潛

曜曷垂有煒彤管仰援素旂誅曰於厯恭人胄
衍清華兩大曰耦嬪于琅邪安貞之吉輯柔孔
嘉翼我中憲用賓王家肅肅鳴鳩桓桓司馬秉
節視師在冀之野監撫楚粵以蕃函夏睠彼內
治誰其尸者蠲潔蘋薦致儆雞鳴爲植海堠爲
約宗祊鑿巖疏沼抗館列楹雖無攸遂實相勸
成展也伯氏食矣能教因孝作忠升由選造民
之父母是則是劬爰蒞我邦惠而我好復有仲
季侍膳大官文孫弈葉競美瓊蘭霄衢蹀躞文

海泆瀾具曰聖善貽厥象賢伯時求思祀兮于
陟眇焉三公豈易一日投劾還轅星言靡及慈
暉乍承瘡首告疾厠踰躬浣刀匕親嘗憂厯樹
背技殫長桑大耄之嗟惟命不于常亦旣耆矣
孺慕以喪盖原一體而分故昔嚙指心痛信宿
先歸幾乎微動情事克申志物備用天若相之
人咨以諷令妻壽母 帝典載隆恭維德隅詞
葆義豐胡云不憇咸頌考終薄述私誅敬詔公
官嗚呼哀哉

告文

告東溪王公祠

水德靈長流宗東會極地相陶滔天不戒維公
爲政百務具張如斯歎逝閔焉望洋濟川其才
納溝用耻寤厥玄夷援茲赤子一勞永逸捐已
率民于來不日工集如雲驅鵲可填飛虹忽引
華表雙標澄波萬頃周行示我舉袂成帷昔也
如塹今也如砥僉曰王公古之遺愛出祖遮轅
齋咨感慨龍蛇直歲賢人是裁縞衣自北而公

訃來指紳纏悲烝黎狂走隣春不相尸祝于久
其適承民牧爰順輿情妥神享室勒辭麗牲有
溪湯湯有梁翼翼俯仰高深維公之德

祭文

祭東郡王封君

峻彼岱宗以表滄海厥風泱泱東涉孟諸放于
瑯邪什之分疆地有越矣天之格矣公降自王
迺宣訓經克隆庥德歷世滋長迺茲懿共式貽
女穀燕翼有方滋德惟何順承勿替其旋利貞

泥蟠九淵或戢其羽載鳴在陰貽燕惟何施于
詰子宜爾振振二十小史三十侍中四十專城
帝曰咨爾股肱予郡實在宛陵內明且敏義昭
威溢職事成遵先後畢理象服允章爰報爾所
三命而俯戒車上儻亦莫敢侮僉曰府君余特
猶母盍壽其父稽首祝天百千萬年永保茲土
帝御明堂周覽萬邦從臣上計旣飭車徒風此
簡書祇揖聖志祖者在門弔者在室薄言公逝
維茲臣庶狂逸于野沈口于涕言剝其廬言焚

其巢所馮曷翳越我皇考王命有赫造士東國
府君躬睿衡理顯白適會纒墨先考無祿王假
府君以撫我服本始循德載色匪怒□□胥植
文予不宣臨眎絕尤比于拊石蹇予搏心不懈
于力庶其不忒予衰儼然府君斬焉斧瓜及葛
凡不有喪揀之匍匐此也什百於維太公葆光
垂裕永終馴首爰有寵綏暨于賜杖五釜享之
疇不曰餘白雲殷晡昭日寢光從公于邁桂酒
椒漿嘉疏鄉其神來旒旒於戲哀哉

祭袁汝鳴

嗟哉汝鳴死矣汝鳴素彊病未逾三夕死邪汝
鳴死人皆謂汝鳴放酒傷其生又以子大言亾
當醉後輒罵座好面折人非凝社之道唯唯否
邪嗟夫死生亦大矣藉令汝鳴不放酒不罵座
面折人能竟不死邪卽余輩睹記塚纍纍相接
也豈皆放于酒罵座面折人者邪汝鳴善詩善
丹青善書廼者書丹青日益善死矣嗟乎汝鳴
未見其止昔吳伯融汝鳴所師事湯定之爲汝

鳴友汝鳴當伯融疫舍湯藥授之及其身亾恨
定之妖汝鳴存其寡撫其遺息斯今世友道中
所希觀哉汝鳴稱詩者二十年後生者起而効
藍田之役汝鳴斤斤心下之至不敢與雁行手
錄其摘謨不寘嗟虐嗟虐文人相忌自古而然
蓋汝鳴獨不然數者有一焉可不死汝鳴卒死
邪可不死卒死顧若等塚纍纍相接者孰久長
也郡中人哭汝鳴惜汝鳴數奇終瓠落家且貧
子幼嗟夫人命露晞眷屬蓬聚河伯問于海若

是一浮漚爾余輩望汝鳴里則哭登汝鳴堂及
寢門則大哭惠子知我伯子絕音嗟乎汝鳴人
琴俱亾汝鳴眎一浮漚爾得無嗤余輩之見河
伯乎汝鳴汝鳴美酒如澠閭其無人惚兮其靈
卽欲汝鳴放而醉罵座也覆何能

祭麻栢亭翁暨張孺人

嗟乎公家蓋余小子家托在肺腑矣余姊爲孺
人雁行迺習孺人事而余小子從先太中得侍
公公朗乎其外冲乎其中其神王其貌窿余小

子年踰舞象也。狂斐自命，二八代升，觴行無算。一日而醉，二參而公時時耳提之。小子無日靡曼，搖精以麴蘖伐生也。嗟乎！余于公安能不痛哉。公及公從兄孝廉公，並能存堞滿之訓，鑒多藏之亾，積而能施，歛而能張，而孺人及陸孺人，則百里之內，色藉，且無菜，而居恃以覆，孟鄙人何知仁義，響其利者，爲有惠矣。人亦言之，人富而仁義附焉，豈所概公與孺人哉。夫以公與孺人好行其惠，而卒中壽以歿也，顧所爲在人心。

者百世如新耳當公歿之數歲而孺人相期玄冥之下今來爲令子吊也蓋涕霑襟不知其何從未幾而卽罹先太中之難令子爲余吊也亦不知涕之何從矣嗟乎今公與孺人且斧而封矣而先太中卽土未期卜兆無所青春受謝白日旣昭安能不令子幸而怍怍焉令子被服美好鄉里歸仁益恢前人之緒而余小子髮有宣尚文質無所底又安能不公與孺人恔乎其一卮之祖也誠涕沾襟若公與孺人初喪然

祭貢玄略先生

不千載其身而千載其身不一世其名而一世
其名剗吾黨所稱先生者哉先覺先知非予而
誰冥揆萬象直破羣迷三鱣爰集五馬載馳肥
則在公瘠則在私蔚然儒宗班不躋崇豈服美
而誨指抑道大之莫容俾壽且臧迺儵云亾將
棄化而歸盡寔不吊于彼蒼嗟乎先生不居者
形不往者心朝聞夕可證古叅今數仞曰高及
泉曰深哲人其萎多士如林越昔窮矣之歎嘗

興予獲麟之歲而何今頽乎之歌卒符于夢楹
之辰二三子又胡止于聳筵者懷舊而亾琴者
傷其嗣音嗟夫雖無老成尚有典刑鯉也過庭
孔壁遺經某等共奉芳藻而續大招也其歸來
乎貢先生之靈

祭王使君太公

猗與我公清標玉潔赤府蘭薰龍泉韜穎駒谷
葆真杜蘅纈珮霞露徵盟達鴻縱軼海雀騫騰
日麻砥德月日崇評培基殖廸澤濬祥臻芝繁

唐書卷一百一十五
錦砌桂馥珠林鳳振炳燿龍奮崢嶸華宮試軌
牛刃發劓節媵凜雪勩茂戴星東南觀答原隰
咨詢薦莪鷹擊霜肅風行出麾畿甸望重藩屏
雙旌承日五馬嘶春鴻安于渚爵集其軒碑礮
羣齒簡錫 帝心維仲若季接羽懷聲允矣名
世匪公曷戚辟彼馱原植木斯宏本支百代克
懋周楨辟彼瀑水簾垂玉瑩朝之有宗流迺自
清鸞章膺寵象闕貶恩康焉履壽約以居盈白
雲在望少微匿明襲綦殊悼陟岵無因淚鵲徹

土驚烏顛冥雲淒掩晷風慘凝陰吁嗟我公幽
潛雅尚趾美鹿門流光衍慶肩譽槐庭脩齡八
秩怡顏九京某等忝屬令子勤睇儀刑曲收椽
桷罔報瑤璫如公可贖詎後百身行旌孔感伏
軾含辛敬然螺甲薄酌兕觥玄爽至止鑿此丹
忱

祭魏兵部郎及趙孺人

猗與大老允憲家邦匪佻而僂旣碩且厯星臺
製錦粉署含香利徵錯節賢輯匡襄淑聲是煒

庶績用康於曠敏肅相履有章苾芬引慶箕裘
襲良江津迷問穹霄倦翔盤趾林礪晞髮滄浪
蒞珮蓀茹薛帷芟裳以吳以翕載泳載揚愛覃
里梓評擅間桑洵安洵考侯嘉侯臧翳維淑孺
嬪德柔莊朱絲好合墨荻誼方芝泥煥燭彤管
琳瑯鸞駟謝采象服貽光戩穀爾錫奕葉仍祥
騷駘其躍鷺轂于陽全歸岐數懿聞齊芳霜函
藻闕夜壑舟藏玄扃屢並冥樹枝雙吹笙跨鶴
叱石成羊寧邛之降厥澤無央某等藉金倚玉

儋鬯實薌御輜雲結執紼露瀼連蜷陟止靈爽
靡疆

祭范子敬師

嗚呼人孰無死師死則邱人孰無歸師歸則鬼
嗚呼傷哉昔師先人作我寓公我有伯叔函丈
是从師生于斯亦訓于族絳帳重陳青氊舊服
回琴點瑟入室升堂色笑匪怒追琢其章繇祖
及孫貽厥燕翼式穀以女維師之力餘力稱詩
覆爾翩翩可羣可怨何莫學焉實旣渝名德不

掩位所冀隙駒或宜緩轡胡然奄棄卽茲宛濱
空精寄滅首丘靡因嗚呼傷哉在旅而眺曰耆
非壽雖彼不遺猶幸有後古爲師喪築室扶車
嗟二三子曷不其如嗚呼傷哉梁木和歌大招
誰續魂兮來西章江之曲

祭貢處士公

蓋公之卒也兩改曆矣而孺人之卒也又先之
六龍所舍子之氏興何奄忽如此哉今並卽土
也不佞輩何能不獻歎焉公故神明胄卽少居

約計然授謀烏倮畫筴家曰之于成二子翩翩
藝林其仲子則用經術顯當世此莫不爲公寵
之也而不佞輩之所以多公者則不直是公之
家可言羸矣而奸行其德察身而不誣卽其子
貴終不曰子貴故自異其平生夫濁世之故不
佞所覩見矣而惟公爲不波卽市中洒削之人
經其廬交之若平生驪終日與奕棋食酒游于
光塵卽其人忘其子嘗貴也於戲今孰有公哉
吾郡失公何能更得長者如公者焉而孺人者

寔與之齊德柔而有終嗟夫二人同心以臻考
祥有子鳳舉有孫鷺翔樹穀者止于獲樹者及
享之矣且也澄然而生凝然而死其榮名曷有
既乎顧不佞輩習公之履狀則何能不歔歔焉
先太中自舞象時交驩公至白首彌篤公之卒
也居無何先太中亦遂不起嗟嗟失托之鳥而
過其故林必躑躅焉裴回焉哀鳴而不忍去嗟
嗟鼎卽有胸亾心也誠怛怛動涕泫爾下矣嗟
嗟居諸逝矣蜡盡之月高臺未悲風陰厓有積

雪嗟我懷人私心九折有酒一尊衆芳斯集
日春將臨其白日昭只魂歸來只鬱若蒿只

祭劉漳平公

萬曆丙戌夏六月十有三日故漳平令劉公以
大耋終劉公德擅人倫名標吏績暢玄風于鳧
化式明訓于鯉趨可謂得全全昌矣不佞小子
梅鼎祚先太中郭恭人並劉氏外生而公又予
大母之姪丘嫂之父也感葭莩其綢繆藉喬木
之流蔭一日已矣鼎小子則以親無失親此自

恒理而神有寄于物外。情有曠于區中心。誠藏矣。何時能忘。因修常奠而韻以言。曰嗚呼。腹痛雖戲目成。不輕知已。欲死烈夫。殉名翳予。與公戚在肺附。銜戢滋深。匪是之故。咨予小子。少單怙恃。首濡飲酒。口多微辭。或字以狂。或題之敖。人各有心。孰測所蹈。公寔先達。洞明炤幽。汝南月旦。季野陽秋。每謂家嚴。可兒若子。豈必簪纓。始稱卿士。予性說學。不狎于倫。庶幾博物。以軌先民。舉國闕觀。何異耳食。生今反古。當失其職。

公夙高唱義緯且經吐聲爲律合氣潛冥嘗嘑
鼎來說詩頤解凶吞雲寢氣蒸渤澥有孫者顯
聿來从予亦趨亦步爰處爰居簡而成章斐然
吾黨衆失因親公歎藻賞詒謀維穀寧不思齊
儻爲繆恭胡我焉依嗚呼予言則枝予行則僻
天幸惠公爲予賁飾邇比絲竹寄志于音予曰
擊缶公曰擲金手削赤蹠卜夏之五洋洋我歌
坎坎我鼓屏翳茹怒淫雨載涂聞公示疾不駕
而驅公彊寒裳追紬良約顧語兩兒其文予託

既承公諱臨發聲吞歌之疾矣難以倚門嗚呼
南州有劔西州有泪聞筵興裏過壚增喟矧予
孔悼兄胤靡遺予將爲紹不屆公期嗚呼信誓
罔遷瞻望弗及矢虔厥終以訓知密奉媿如母
眎公如生持此一勺庸展孤誠嗚呼傷哉

合宗祭沈君典太史

嗟呼傷哉君死矣君死矣夫死等耳世有宜死
有不宜死有陰甚深文閃倏狡獪如鬼如蜮不
可方物者法宜死而君鴻朗夷粹無城府無町

畦底裏洞見雲霧可披不宜死有喩喩吡吡洪
忍脂韋口柔眉語籛條戚施以干當世者法宜
死而君高眎濶步寧諤諤無寧汶汶寧佹俗無
寧同塵不宜死有錢奴大賈蹠財役貧貫朽紅
腐陳陳相因而不能散者法宜死而君務施樂
予片言雙璧一諾千金室惟懸磬座客常盈不
宜歿有持方寸之印縮半通之綸堂高簾遠眦
睢盱衡者法宜死而君爲天子左右侍從之
臣九卿三事咸在雁行恭桑敬梓偃僂循墻若

紀渚子之鬪雞七日而驕氣盡忘不宜死有緣
執襲名玉表石中未能墨守迺作輸攻釋已事
之已拙笑前人之未工者法宜死而君萬言倚
馬禪世雕龍示瑕指類惟善是从不宜死有藉
名自好肥瘠斯人在原徒詠無衣何親者法宜
死而君饑溺由已痼瘵在身周卹其困遊揚其
聲褰裳共濟跂而望人不宜死夫卽耳目所睹
記其林林而總總者多宜死者也而不死君不
宜死迺以死何邪其宜死而不死猶謂豺虎蛇

虺草天木喬皆兩間所有耳至不宜死而迺死
豈豫章之林卒不如九之樗而麟鳳不世出
邪或者用三說解之則以一元之運今而季矣
故西狩而反袂傷非其時此所謂以天用也又
以郡之山不盤礪水不齋淳土磽則物脆是風
氣使然所謂以地用者也又以君家自先柱史
起家而君儼然稱太史君之猶子舉孝廉君之
子舉茂才鬼矚高明道家忌大盛此又以人用
者也之數者狀邪否邪嗚呼傷哉余家太中與

先柱史同鄉籍已而太中之弟子有葭莩之親
太中之子有兄弟之好然所親好者要在太中
父子兄弟間耳余家人且萬指數因以施及余
家者抑何可勝數哉屬君之死也纒纒來相問
言者至闐爲之穿而市爲之罷自薦紳大夫以
及洒削臧獲之輩自辟踊崩角以及齋咨嘔噫
之聲趾相躡耳相錯也嗚呼而况君於余家何
如者余曹安能嘿然而已乎君健如嚙馬素善
酒近者氣充色益澤雖言疾私度其神且王也

及于病而余曹始稍稍疑之走禱于羣望使君
而可贖也未嘗不人百其身也亾何而以君死
聞矣死之前一日鼎祚以書抵余家諸少趣之
來訣君諸少年投箸而起馬不及旋而竟不獲
與君訣嗚呼傷哉嗚呼君之於余家輔車相依
也失其輔則悲君之於世世波所維也中流而
失其維則悲余曹何知當世饗其利者爲有德
耳嗚呼余曹由山中來過君之隣春不相矣倚
君之門歌不揚矣登君之堂總帷張矣弔君之

月三十一日三集二ノ外二二二
兄而撫君之子則鯉趨庭罷鴻序中翔矣尋挂
劍之知何期宰樹軫聞笛之感不啻山陽而已
嗚呼君以逃名而名寔全君不永年永者非年
其來悠然其往翛然歸骨于地歸神于天嗚呼
有心則銘有涕則零可盡者涕不晦者心傷哉

祭沈君典太史

嗚呼君典君典兄而竟止是邪夫兄而竟止是
也天果有意乎兄邪其抑無意乎兄邪是邪非
邪余同籍兄弟數百餘曹其相以周還稱最習

則未有如我兩人者也蓋余來爲宣城令而兄
急還里居凡見兄所爲度如月斯朗如川斯平
桔槔盡屏鱗甲不興見兄所爲氣如電之掣如
霆之驚千鈞莫挽百淬莫磷見兄所爲才二京
具體五言長城退毫成冢一字生金旋矛如轂
回策如縈運籌借箸察象分形此其志意總貫
畛域殊方要之此人者天必非無意而生也而
竟止是以歿也何邪夫旣豐之孰嗇之旣嗇之
又孰豐之豈所謂天亦夢夢爾而其豐與嗇卽

一人之身前後而偶有所直邪是邪非邪嗚呼
悲哉余來五年于斯矣左提右挈令余一人無
顛越于民上無得罪于二三執事之臣者非兄
邪左圖右書以令余豎儒得探縣圃之秘傾多
寶之藏日聞我所未聞者非兄邪左指右畫陳
天下阨塞利害處運漕防兵諸重大計者非兄
邪左壺右觴日飲余以醇醪譚詭風刺不以爲
虐者又非兄邪爲時幾何而兄竟奄然以長逝
也嗚呼悲哉今余以干旄造兄之門而青蠅之

弔白馬之賓集門中矣登其堂而兄之二孤嫂
夫人難兄猶子躑躅號呼帷而哭于堂内外矣
撫其棺而漆燈熒熒總帷飄飄然欲舉矣嗚呼
前所謂提而挈圖而書指而畫壺而觴固皆余
耳目所睹記也是邪非邪爲時幾何而率驟然
以改觀聽也嗚呼悲哉余鄉舒君芬以昔者之
丁丑首 庭對其官以修撰其歸以諫 南巡
其年亦以四十四后六十年而兄繼之兄之鄉
在宋丁丑爲吳許公潛雖身宅端揆而其終也

投身瘴鄉首丘非所之數者或遠或近而與舒君尤獨近似去許公之終遠矣然而未宅端揆也又許公七十餘年以死夫天道十二世爲一運其于許公一運矣于舒君一小運矣豈丁丑者猶夫龍蛇之歲而數君子適丁厄邪抑君之羸水不勝土而地運無以承其全使然邪此其故余不敢知矣送者及于涯君自此遠我獨何心而能不悲乎嗚呼有酒如池有肉如坻兄如有知兄如饗之是邪非邪恍兮忽兮嗚呼悲哉

又

嗟乎嗟乎太史物矣長庚匿曜魁象弑精殄瘁
興感邦人寔嬰孰不有死死貴有聞孰不有生
衆庶馮生於樂太史鳳彩早轡龍頭中據眎草
鑿坡宣麻玉署帝眷方殷衆心攸注玉潔日光
風騫雲翥中焉罔憚託志長林上書請沐瞻

闕投簪豈曰謝老二毛未侵豈曰畏滿百石不
任驥足方馳中衢自蹀羊角方搏中天斂翰痼
疾烟霞睥睨霄漢酒頌清狂劍歌扼腕操觚散

帙于彼郊園客盈北海士集龍門千金一顧雙
璧片言推襟送抱歛箠餘墳性好長游具兼濟
勝湖海扁舟柴桑三逕或証玄機或叅心印耳
目若遺盤桓不進有喜勿藥眷言 賜環方舟
肅戒在宛之堧胡而起色遽成口顏一夢七日
帝饗鈞天余曹不敏瞻仰靡暇佩德日親居然
與化接席窮譚陶陶彌夜舍堂盖公式廬卜夏
奄亾著蔡曷用范型樗全不類蘭焚以馨淒風
舉帳落月窺庭儼然如在卽之無形嗟乎太史

中壽未躋英名鮮儷知也無涯大年猶贅逝者
其身有不俱逝家挺玄成一經紹世歸神廣莫
栖息清都維茲蒼赤跂望來蘇雲霓儵忽霖雨
虛無百身可贖九閻可呼嗟乎傷哉白雲在天
大江東注一闕玄宮千秋長暮蘋薦薄申招魂
一賦靈其翩颺鑿茲衷素

祭外舅唐嘉議公

於戲悲哉泰山頽矣龍蛇之會賢人菑矣皇天
何知不憝遺矣世道江河不可維矣夫以公之

出入三朝而爲時三變也 世廟之季大墨用
事則其時尚賄公方分曹銓部而矚然其不淄
穆廟之始維新爲政則其時尚核公方敷歷中
外而渾然其不苛至於今和光著德則其時尚
通公方徊翔藩臬而整然其不倚挺然其不同
以故仕通籍者二十六年矣家中人爾其間或
稱貸而嫁其女或歲一饑而口衆食貧也官嘉
議爾其間或起而躓或躓而起粵西之役跡起
而寔則躓也夫其官久減產婁起而婁躓此豈

非人其五十四年而竟死死且在萬里外此豈
惟人嗚呼悲哉鼎祚聳公之遷粵也嘗寓書于
公人言之仕宦不止車生耳蓋意不欲公西也
書未至而公西矣及查憲使行人來又寓書于
公莊生亦言之人遠行送者至河而反蓋意欲
公亟東也書未至而公卒不能東矣嗚呼悲哉
王臣王土義無可自擇也歿等耳魂氣固無不
之也世有黃蠟貽背湮滅而名不稱者抑何可
勝數哉故公之客歿不足悲歿則悲公之歿不

足悲歿有與于斯世則悲而鼎祚有所私概于
中而齋咨涕洟不能自己者則以公長女爲鼎
祚婦也爲婦十年而未有舉也少失恃又多病
也公以失恃則爲之恃矣以爲病則爲之病矣
居嘗謂卒未有舉卽以上壽終而目不瞑矣公
瞑矣而卒未有舉矣是公之愛長女甚于其女
則以厚及其化者故而公長女之哭公甚于其
女則以卒未有舉故嗚呼鼎祚三月之中而失
母失其外父公之女失父且失姑總五月之中

而鼎祚失其外兄又失其女之王舅總五年之
中而鼎祚始失父公之女失其翁嗚呼爲時幾
何而骨肉之喪踵至門內外之親淪沒無餘也
人生幾何而憂愁哭泣以相繼也自非金石軀
安得不速老乎往者鼎祚好長夜之飲所稱酒
友而爲公肺附之戚者舊則沈生近則吳生公
以此足傷生而伐性未嘗不交相戒也然而公
亦能豪飲又未嘗不豪飲我輩也昨歲之秋連
媼沈生而以鼎祚居其間置酒高會鼎祚及吳

生挾清倡酣達旦公中自逸去而潛自壁間窺
兩生且時時趣豎子行酒嗚呼遺言在耳遺跡
在目今卽飲何能從公飲耶卽不飲又何能從
公戒不飲耶吳生益跣跣達生沈生有長往山
林之志卽哭公少間我輩未嘗不聚飲飲又未
嘗不長夜也嗚呼公其聞邪公其不聞邪嗚呼
萬里魂歸卽此幽棲兩鑽其火總帷以淄雖有
令名壽考不齊雖有佳兒三尺負衰雖有難兄
髮蒼而耆雖有快壻不類則余不腆有具不斐

有詞既以哭世又哭吾私嗚呼哀哉

鹿裘石室集卷第二十二終

鹿裘石室集卷第二十三

宣城梅鼎祚禹金著

祭文

祭關中馬相公

噫嘻巨靈躩踢勿華蹈襄天昭景命河出榮光
賚此良弼降而生商爲鼎爲呂如珪如璋丕顯
世廟恭嘿思道太乙青藜臣司讐校於爍
穆宗允達四聰維揚織貝臣職登庸馮几斯授

負宸敢後政聿更新人惟求舊 天子日卿典
禮寅清上垣重朗中台載明舌調斗杓元氣斟
酌手握鈞衡羣材羸縮正直優柔敷明答幽民
力普存 帝德其庥皇造弗竟龍蛇之運水鏡
倏淪神著卻問司馬桓桓以聞 至尊玉衣借
寵金盃崇恩輟朝震愕樂懸不作祕器東園邗
連北郭大鳥鳴悲櫪馬驚嘶胡而摧嶽豈繫桀
箕某奉將尺一填于南國羌罕成謀弱翁主畫
承諱搏胸臨風霑臆置芻何繇我心孔棘噫嘻

傷哉

祭御史大夫陳公

嗟夫古稱燕趙慷慨任俠其俗好椎埋鼓鑄鳴
瑟跼履而遊而有哲人君子者出焉則必氣亮
擅世節槩殊羣以負一代之雅望自不佞所睹
記故今御史大夫陳公矣蓋當其義惠文簪白
筆彈夜堂之警破綺室之辟天下莫不爭嚴之
而曰此 明天子之威哉其或扶膚就立繇卵
終翼守谿谷之爲雌體山藪之藏疾天下莫不

爭歸之而曰此 明天子之惠哉建夫投紱都
門懸車里第 賚之黃金優之傳餼敝衣羸馬
張光遵晦言準運規恢仁履義公卽無意于斯
世也天下固莫不冀蒲輪之迎祝玄纁之及以
爲百僚之風厲而何居乎三事阻登兩涯忽閉
矣天下又胡嘗不痛老成之彫落而 天子釋
心膺之重寄哉嗟夫有嚴者祠宗伯司之有斧
者封司空資之彼嘉者辭麗牲穹碑彼美者謚
銘功鼎彝 天子之寵靈公者靡一有遺而公

其可以于于而怡怡也乎嗟夫臺栢烏棲署梓
鷹集霜令遽違火精遂匿不佞小子宿接風稜
旣撫南服吁嗟露零中山截業房淵清泚萎矣
哲人樂只君子左右洋洋鑒茲明水悠悠我思
曷維其已

祭鄭京兆

於麻京兆爰秉雋德旣以緯文亦以經國珥貂
青瑣給事先朝天回一路風表百僚羽儀用
振葵心式昭卽讐醜正繁言孔囂覃恩在宥少

鑄外秩未幾 賜環 聖聰燭日投彼青蠅逾
彰白璧綱紀諸曹寅共厥職帝心攸簡光祿躋
崇眷茲哲輔實比鎬豐京兆煌煌岳薦我公左
則馮翊右則扶風 三錫寵臨兩楹寢作星殞
南箕峰摧中嶽表聞至尊輟朝縣樂祕器東園
祁連北郭施于仲氏鬱有令聞時清攬轡霜肅
埋輪填箎叶奏金玉爾昆萬年可死少孤挺存
往余壬戌附公驥尾薦分南服公鄉至止而公
來南徽音日邇熾我良朋天只人只越在封畷

凡百有司素車遙阻玄醴是醜通德有里而公
繼之俎豆有祠而公在斯嗚呼悲哉

又

繫大江之泱泱而澎湃兮環敬亭而崒嶭肇錫
靄以有嘉美兮挺生此南國靈其信姱以練要
兮遵先民之遺則際三后之純粹兮式縹纓而
象服雖知蹇蹇之爲患兮余司諫其何懲所作
忠而言之兮諛先君而後身荃不揆予之中兮
齋怒興悲回風兮搖蘭蕙其不芬羌景命之惟

新兮人惟求舊諒茲正宐兮自天祐回翔中外
今躋盛邁信君子之假樂兮亦孔之厚高兩都
而並建兮光祿厥司睠清華之薦歷兮矢言進
思僻威鳳之千仞兮覽德輝而下之分九列之
鏘鏘兮四岳維咨詹風裁其獨持兮陟彼京兆
胡卿月之燭赤以周章兮而奄然其匿曜豈短
算之不可引而前兮迺詘長造騏驥方驂驪而
驚遠馭兮頓躓足於中道 帝聞曰吁兮摧此
棟梁衆僚悵悵而心煩愴兮展也無良慨寄生于

流星兮蹇儵忽而莫當矧鵠鶴之在原兮圖急
難而徬徨嗚呼恒沙萬劫兮紛無盡條然而來
兮往而順小年大知兮同一曠伊惟令聞兮寔
哿徇余小子之不敏兮同升在公旣與余有成
言兮我心則降參鸚鷺之清班兮或夔或龍躬
輶輶而効駕兮涕般淫之非無從嗚呼緼色兮
芭舞鳴洞簫兮交鼓播芳椒兮蕙蒸靈連曉兮
將下

祭二叔父

嗚呼痛哉叔父而死耶叔父而死耶當叔父覽
揆之辰也羣族之父兄子弟張飲于堂履屣交
躡薌澤雜陳叔父引滿若卷白波神甚王而氣
甚壯也常呼不肖輩而慨然曰吾老矣爲驩之
日短汝輩立醕醕已則和歌相樂今去之三闕
月耳而遽有今耶所謂爲驩者何竟短至此耶
然憶叔父方在襁而失吾祖卽太中公甫十餘
齡伶丁孤苦劉太恭人日夜持之泣而所深慮
叔父者不必長長矣不必立而詎意叔父有立

且年七十耶卽叔父稱艾時得心疾凡三年太
中公而下又無不日夜持之泣二子幼何艾之
是期而詎意諸子俱宦學且年七十耶凡叔父
七十年之中方其冠太中公業舉進士叔父兄
弟三人者秉家政蓋是時一職其外一職其內
油然無間也而叔父尤倜儻豪舉以郡中平賦
事與郡守相爭辯而又平役于六邑率二三父
老走闕下白狀此豈與今世籍其強蔭以自封
而已而及叔父爲政于族亦且理自如者起而

叔父杜門白洋矣至于今而官府多梗陽之獄
閭巷多博飲之聲少長無敘町畦漸分而人始
追思叔父爲政時也而猶未嘗不望叔父之常
健好尚有典刑也卽叔父年七十豈不壽然曷
勝殄瘁之懷耶而况姪輩其爲情固百倍此者
也粵管丁卯南泉府君亾丁丑而雙峰府君太
中公相繼無祿而今丁亥矣豈所謂丁者卽龍
蛇之歲而賢人是菑耶嗚呼而二十年之中弱
者壯壯者且將老而亾者又其人與骨俱朽矣

嗚呼桓山之鳥四分其翼三荆之歡無復同株
自非異屬孰能不齎咨惋痛而悄焉內傷者乎
嗚呼而此十年中外侮踵至釁隙叢生姪等不
類無能爲叔父逸老而貽之戒心則又我輩之
所引慝負楚而絕焉內愧者也而若叔父少而
孤艾而病而以今七十考終也且獲令名見其
子若孫有成矣何所可恨哉嗚呼青春受謝白
日旣昭草木莽莽孟夏滔滔把手入林感修竹
之無恙圍碁賭墅歎東山其遠遙嗚呼痛哉

祭仲舉侍御弟

嗚呼爾其吉士爾其御史剡辭若華其直如矢
煌煌兩疏志隱以昌一恢天網一翦中璫于公
則難而躬則渙門不易軌田不拓畔予家閭右
不有令名見羣必掩駕時而行匪爾曷恃庶爾
終譽爾之不終安所無射爾豈鮮兄厥私兄我
衆謂曰否爾謂曰可我躬不閱披執爾權狐狸
狐搢爾我不譽筒詩函書墨渝紙敝手足如新
一字一涕嗚呼傷哉爾位不超爾年不遼所獨

恂愍血胤寥寥嗚呼人孰無死爾其足死遺孤
於腹妬人之子嗚呼天不與善婦且忌才命之
不融亦已焉哉

祭劉世宣

嗚呼人生有三其一曰名君藻思雲湧謔論風
生孰不羨分才于八斗讓驚人于一鳴而天何
固靳竟老明經古雖有死誰可無年君挺修榦
翼以長髯食捲龜殼飲吸鯨川疾呼掉臂神王
骨堅而奈之何髮徒踰艾老未迨傳君晚舉子

庶美以章李苦多實桂久必芳或商瞿之可冀
在若敖其不亡乃胡爲痛割若斯乎而預玄之
童烏不秀量象之倉舒頓殤嗚呼傷哉材命不
適血胤何存英雄到此天道寧論邈矣酒壚指
河山而怨故悽然隣篴臨風月以銷魂而況予
之與君也望衡對宇異樹同林少投喬伶之分
長申秦晉之婚斧瓜及葛將使神爲之不秦焚
芝歎蕙豈若彼涕之無因者哉嗚呼榮名亦盡
年運亦窮所貴不朽善積厥躬享子克紹無成

有終曷異屬毛而離裏夫寧罔魚而麗鴻嗚呼
傷哉夜臺永閔宰樹焉依白日旣昭痛春暉之
受謝大招虛續望魂返之難期有肴登俎有酒
盈卮洋洋陟降翩翩來遲予兒君婿周旋在茲
生平一哭以殫吾私嗚呼傷哉

祭冢宰栗菴宋公

義肇陸佐軒劾百神凡肩景運必篤忠貞列珪
蘭席調燭璇衡如律斯應有契而興

肅皇季年榮光出雒迺挺宋公翼龍淵躍指佞

則靡觸邪猶攬正色嵬嵬昌言諤諤鎬豐舊服
南輔是張河山美固西晉莫強從公于邁繡斧
焜煌冬占愛日秋凜嚴霜燕趙之垂中帶如礪
爰陟中丞長城攸寄坐躋三關以控幽薊暫叶
雲心薄棲地肺 帝惟求舊老成克襄蒲輪加
璧儼我周行司徒載陟出入必將歲之不若民
訖小康粵稽天曹九流銓鏡改玉自公黜幽登
儁愚智咸皈妍媸懸定時尠滯才物趨無竟其
勤 王事寧閱我躬病餘屬息職思進忠庶殫

臣力仰荅 宸聰身殲志決命豈不融嗚呼國
寶淪輝台星匿曜大鳥潛臨元龜缺兆縣樂輟
朝崇文易號衆庶纏悲皇情震悼某等管叅河
潤茲共巖瞻甘棠勿翦公所憇焉倏承凶問敬
肆祖筵樂哉商丘公其來旋

祭毛大理

嗚呼震澤底定東漸于海淪陰鷄陽元精所滙
迺挺英人命自真宰質有其文鬱爲奇采東南
之寶薦而國珍迺筮司士盱水之濱旣遷在發

持法均平析楊晝臥肺石朝清正席高談明刑
弼教士有餘師道無遺照詩授毛萇法兼慎到
有恭 綸音睠焉首召西臺爰陟耳目攸司矯
矯其氣諤諤其辭威占白簡直詠朱絲爲綱爲
紀是拂是俞行行驄馬式臨貴竹夜郎之王靡
莫之屬文命有宣搏心臣服霜靜飛嵐春回窮
谷自南旋軫載蒞于東環瀛帶岱大國之風申
言三命雒邑天中舊驄在御行步逾工 天子
曰咨亦旣勞止棘寺孔嚴女其予理折獄電章

霈恩波瀾克愛用威樂只君子時方多故倚重
匡襄孤卿虛位佇示周行彼蒼不憖二豎無良
明庭棟折夜壑舟藏某等夙拜下風獲依東土
我覆我帡若在公宇乍接總帷緬懷繡斧醜酒
燕山以申薄祖噫嘻傷哉

祭殷金華使君

嗚呼惟宣不覓風日以流非公砥柱欲挽何繇
沃壤如膏公則澤鳥棹楔成林公無片石彼羣
羔雁羅爵公門彼居義鳳旋馬公庭疇不讐書

公不釋卷疇不遺金公無爲歛嗚呼公名奕奕
公子翩翩亦踰指使豈曰小年凡予所悲以悲
俗陋士首四民誰執斯咎老成旣物典刑莫存
江河之勢坐見崩奔予管與公罕接杯酒私歎
服膺願公長壽史有羣燭屬予序之公草未脫
予諾不辭嗚呼凜秋其涼青春受謝明水薌箕
聊祖公駕嗚呼傷哉

祭奉化兄子登

嗚呼念子與余系本汝南靈宗旣衍祖德維宣

家皇服藻若翁考槃子長予倍豈曰隨有卜隱
在市望宇對衡去尺有只歷寒以溫子卹予戚
予驪子欣譁浪風刺則莫不承好友遙集吳子
汝州胸無城府空洞可遊爰有君典俠者之流
剖肝決膽一諾千秋姊夫者涵其德玄夷頽然
沈醉放於威儀睠茲二老祭酒是宜予少自佚
亦趨亦追凡我數子若屬之毛良辰庶撰嘉月
式陶蕩舟曲海縹馬神臯或間者潤我心則勞
子製三雅觴行無方子出豐饌食單最良速我

諸弟奕奕衆芳夜已繼日已無太康歲圉貞若
子及吳子先後馳驅于洛之汜一刺汝陽一令
汜水君典侍中煌煌太史嗟考告俎越在冬仲
予固魏遷子亦腹痛縞衣自南來歸我賄陳彼
素帷昭此丹慳若翁安食予奉杖屨敬老近親
而况伯父子有姊夫胥處胥宇展也良朋一散
成兩三仕爲令終其於越疆斯益張型猶始發
氣足攝志才亦應粹民風用競我躬不閱 帝
日良止亦旣徵止耳目厥司冀子焉恃陟岵靡

依趨庭曷自匍匐孔旋哀思如燬予母辭闈蹇
予弗造邁子閔凶握手相勞咎者龍蛇涵也不
弔白馬東行齋咨隱悼涵鬼不孤君典從之兩
賢踵尼天道何知予泣謂子汝州來斯寥寥二
子非子疇依昨予置酒達旦爲驩予先告涵子
亦漸酣抵掌道故向予而歎存者晨星逝者夕
川子更治具要予詰辰夜漏偵子子方呻吟使
望于道忽傳子音乍聞掩耳三復遂真嗚呼悲
哉足不及屣步不及翔撫尸一哭四顧傍徨子

唐書石室集卷之三十三
十三
含子歛予實以襄人厚子存子厚子亾

祭吳汝州

嗚呼于時載蠲玄冥啓節華復于根水堅于澤
生土皈土百昌一跡嗟今吳公始反其宅其宅
伊何敬亭之旁圭兆協吉負陰戴陽宿草不哭
禮亦有常惟公是隱寢久寢章公降庚寅二十
以長忘年下交締之藻賞予幼稱言連則古往
衆詫且疑謂誕與妄公歛咨予斯文肇興屬序
烈祖世以紹明聿來沈子爰及袁生共相贊翊

以翔虛聲公秉長材植幹精短瓠腹便便黃湏
纂纂公緼沉幾形崖蕭散送抱推襟畢其誠款
予佻而猥導以飲醇予蕩而佚勗以葆神善醉
無苛善謔無愆叶凡茲惠好歲紀周辰旣駕蜚
魚作牧維汝士有視鹿徒有嚙虎丹刑式班莫
余敢侮移書見諮將無太武比予失怙苦塊糝
然公行在遠承諱怛焉曰女父子夙昔周旋引
紼雖阻置芻告虔計公爲政期月已可微疾偶
膺遂南其舸色靡顧怯胸靡磔矧心齋坐忘冀

存真我公所未忘平生知交把手道故永夕陶
陶入侍甘隲出命澄醪庶幾人樸以遊逍搖卓
爾長君爲余僚婿仲以禮鳴兒時質劑惟玉宅
攻惟金汝礪情儷若翁分鈞舅弟母慈捐養方
卹閔凶耆而嬰泣搆于公躬忠不建竟孝克令
終熾我喆人彼蒼者穹宴處中堂三歲不覲進
必揖公笑言誰適西州叩策山陽聞笛敦交二
子先履允廸嗚呼人如其面肺孰附肝世漸於
醜鄙孰使寬逝者如斯來者奚觀予竊深軫豈

私特單鳴呼賁此新阡封若夏屋一訣千秋縮
茅薦熟生也有涯身也曷贖風期匪姚靈昭以
肅鳴呼傷哉鳴呼傷哉

祭麻經府

嗚呼君度而沈窅矣莫窺九仞之墉千頃之陂
君謨而斷有開必先七札之利十朋之詹君勁
而直不卽我仇折之無回鍊亦匪柔君饒而達
綸縮半通豐翔其屋賁飭厥躬吾聞至人雖病
不痛數病數起君始庶乎又聞豪士耻彼闕觀

用賓在 闕待命于蕃嗚呼朔風鴟嘯燕霜鵬
蜚宦真爲幻鬼實曰歸位不副志年復讐才斬
焉三尺彼蒼何哉嗚呼蚩蚩戴星何必以乳芒
芒畫壘何必吾土所盡先世積仁名里迺餒若
敖忽諸不祀善祝有孤傳業有女羣從伯叔爰
居爰處鼎等旣屬懿親夙稱執友聲咽亾琴涕
傾釃酒嗚呼魂無不之大招徠返自北徂東跋
而不遠哀哉

祭楚雄孫太公

嗚呼玉斧所畫威楚啓疆劔以鳳阜衿以龍江
井躔分詔日界畝王醲郁旣稔鬱習斯章迺挺
碩人興彼甲族葆真弗曜歛醇自淑饁敬如賓
貽謀惟穀蒙金于礦緼璧爲璞璧剖而良金冶
而精充筐禹貢獻睽虞庭雝雝聲律便便腹經
仰追來孝俯莫不振丕哉祖烈展也孫子笏床
在望戟門伊始綺歲夢松法星占李有棣者華
亦覆鞞鞞筮讞丹籍塵申竹書恩宣解罔泣閔
向隅緣儒飾吏臨高若虛凡茲蚤服悉稟先模

得全全昌克昌厥後右挈左提安歌食酒佇命
紫泥用娛黃耆胡大化易遷而期頤難偶粵我
尊甫于滇作蕃式間執醕憲老乞言文孫至喜
我蔭我援承諱怛怛匍匐赴焉噫吁噫百順聚
矣永終譽矣靈其豫矣慕而孺矣桂蒸具矣椒
漿絮矣寫茲愍矣冀無吐矣嗚呼

祭麻贈君暨陸邢二太安人

嗚呼歲戌貞午翁世云辭非龍非蛇賢人是菑
伯也在疚予姊字之仲季誠良駒而未馳維時

家皇無祿嗣子哀慈煢煢髮有宣矣姊方困髻
予筮毀齒兩遭不造天只人只噫陸太君儷美
于邢車必依輔響必應聲九雛克將七子焉均
旣屬之裏無忝所生去野卜市出入咸耦望宇
對衡升堂拜母眇予提攜推梨釀酒情屈弟昆
而恭且友凡昔庭訓率舉我翁一賓東序三對
南宮勸施不匱徐盈若冲奚其爲政善積厥躬
曷與交成盖繇內德爲皇爲英是效是則托彊
弓弭靜好琴瑟載儆雞鳴貽謀燕翼燕翼之謀

碩博以敦或與璧水或侍金門九流銓管百庶
俱存 綸綍有蒸賁自 帝闈 帝咨曰季篤
親靡展朕惜爾私賜沐旋反大事迺襄幽光不
聞知死致生悠哉卽遠爰居爰處宰如舉如稽
顙徒跣兄奔弟趨文孫奕奕亦顧瞿瞿觀者罷
市祖者傾都嗚呼翁母中殂伯氏先往攀荆萎
條瞻橋失仰樹且有實樹者不享痛定逾思歡
臨觸愴嗚呼 恩暉薦陟徽音永道言從其始
無疆惟休予所銜卹什伯匪酌籬經漸佚宅兆

何求循曩撫今一刹那許季申姻媿仲密心膺
我姊來歸甥虔樽俎世有懿親用篤公怙素騏
遵路嘉樂肄堂駟彼乘駟以侑椒漿中驂一鶴
左鸞右鳳冀靈之愉放佛翱翔

祭處士唐公

嗚呼絳灌無文隨陸無武通材實難駢生孰伍
爲家之楨爲國之輔凡茲全昌由彼篤祐公先
者永二子有聲瑾文都雅陵武縱橫孫謀詒厥
祖烈不承蟬嫣奕葉澶宛之潛惟公蚤脩潛而

弗耀先著睹澈澄懷觀道都講授經載色載笑
正席式儀過庭速肖曰咨爾仲力儒是襄學饒
白僕業荷青箱司徒升造用賓於王彪乎最怒
馬獨稱良伯氏曰哈有生弧矢兔豷爰興馬革
後已西播東酋四郊多壘飛而食肉一蹴萬里
昔約今恭公秉一操與世相嬗永示不佻庶謂
人朴豈其人杓據德循齒彌高彌劭嗚呼吉祥
甫集卹閔倏搆能仕教忠皇報孔厚絲出如綸
暝不逮晝將風木震吟而露薤銜奏者矣茲歲

南至迺靈北遷並屬綰帶聿陳祖筵行罔不惻
用莫不虔旣殫情寄亦表欽賢

祭兩池一從祖

嗚呼君陳有政是亦爲政象火出風正家國定
迨彼無良具曰予聖我公焉依以敦憲令昔我
嚴氏拜公順風親施九族法衍大宗祀事孔愷
廟貌有崇在奧在序肅肅雝雝公不師古動輒
合禮慶弔必臨繁簡得體敬老近親維恭克弟
凡茲考祥其旋視履公無宿義朝聞夕行志所

不可死所不能公正發憤裂背熏心怒倘色爾
賄不及門嗚呼天之方定申命保阜旣耄而康
復昌厥後或素其封或黃其綬或雕龍其詞辯
馬其口令名壽考得全實難詒謀翼燕就養承
驪芝泥待播薤露俄先生而洩洩歸亦僂僂嗚
呼有涯之生無涯之智予所盡然云亾歿瘁遺
問雖存典刑曷寄茅靡波流孰知所墜我失我
怙所尊薦違周眎今昨墜施日喪漿桂蒸惠匪
哭其私何憂何求悠悠我思

祭梅木率

嗚呼問子之年四十與期間子之母七十而婺
問子之子而以卅考且先子身夭折半之抑固
有情之荼毒人境之偏竒者哉嗚呼子不博學
亦雅好文威儀棣棣書翰斌斌子不泛交亦復
好賓酣法獨異食單最精子不辭富亦不憂貧
生有厚奉沒無餘羸子不殉衆亦不離羣冲乎
若谷温然若春依俛夫士之所謂達士而世所
稱善人者耶而何以遽罹斯也昔余哭子之祖

已哭子之翁翁則宦達祖則考終今且哭子矣
則值天之方未定而特遘數之窮余又安能徵
恒理于悽悽者而解子衷撫遺孤見孺子慕者
猶恐其不勝喪也而痛垂白者呼壯子以何從
子之臨革祝無請母之櫛蓋櫛美材也左握母
手而右携子然不及婦焉子可謂死而孝矣若
所稱善人與達士者益曷足昭子之躬嗚呼子
之母子婦能代孝也子之子子婦能食而教也
且又有托之者矣何謂天終不定耶所不能加

肉于子之骨而還之于斗極者年耳夫人誠不
可以無年顧孰能必有年哉諸行無常是生滅
法卽百年一瞬耳余輩周旋久語有之生相憐
死相損勢有必然其以一卮醑子也子將無吐
其言曰然不然耶嗚呼傷哉

祭賀醫真菴

嗚呼醫者曰意醫者曰依意則獨運依則衆皈
粵稱仁術貴秉先幾吾土何藐茲道實微爰有
賀君洵文且博儒必多通醫將有託五色長桑

萬金良藥變達喏嗟化闕爪幕或爲老人或爲
小兒族會在理左右咸宜智不昏利信不後期
巨卿走幣魁士交綏胥又以生厥司維命福不
幸回神其締聽旣寶嘉名亦挺賢胤燕翼貽謀
鵬搏直奮嗚呼君胡不待天胡不仁五旬餘紀
孟月肇春方茲庶物而歷斯人曷由永濟蚩蚩
之民余生善疚集荼與蓼旁測歧黃時相論討
若子若孫是匡是保冀我大年別君中道嗚呼
悲哉有母垂白養不逮終有婦割股孝不克從

冥猶炯炯魂更悽悽陳彼薄餽寫此哀悰

祭麻造之

嗚呼君出清門代翔善事甲乙之科已歷三世
唯兄晚達將遙于季詎意中達遽爾長逝君夙
嗜酒日醉二參濁醪妙理勿與醒傳墮車不死
藉以自全不知我者謂天天年君不嗜財浪傳
請托半爲解環非必克橐旣來儵忽隨散寥廓
太丘道廣仲長志樂兩俱應跡君自有真折旋
協矩曠度無扃友于兄弟篤睦親隣口絕臧否

氣杜虛矜有田而腴不問扈稼有子而才不求
鴟炙優哉游哉與時代謝留亦浮生去無怛化
嗚呼此真總攝彼跡已徂稱譏並釋達者是模
衆惋君死君嗤衆愚但愁夜臺無酒得酤聞有
治命積逋必償恠我同類置德若忘得正而斃
斯言之昌外不了了中實有明叶予非從兄弁
且及艾鄉校都試我負子戴蜚沈小別心期常
在茲別永別欲扳靡逮嗚呼三荆孤幹修竹異
林羈雌風折啼鳥露零梅橋黛冷荷蕩波澄一

靈來憇三雅橫陳嗚呼傷哉

鹿裘石室集卷第二十三

終